

## **იერუსალიმის ჯვრის მონასტერში ქართველი საზოგადო მოღვაწეების მოსახსენიებელი პარაკლისი აღევლინა**



ისრაელში საქართველოს საელჩოს ძალისხმევით, იერუსალიმის ჯვრის მონასტერში, შოთა რუსთაველის ფრესკის აღმოჩენიდან 60 წლისთავთან დაკავშირებით, ქართველი საზოგადო მოღვაწეების ირაკლი აბაშიძის, აკაკი შანიძისა და გიორგი წერეთლის, აგრეთვე შოთა რუსთაველის სულის მოსახსენიებელი პარაკლისი აღევლინა. ინფორმაციას საქართველოს საგარეო საქმეთა სამინისტრო ავრცელებს.

მათივე ცნობით, ღონისძიებაზე დამსწრე საზოგადოებას სიტყვით მიმართა ისრაელში საქართველოს საგანგებო და სრულუფლებიანმა ელჩმა, ლაშა ჟვანიაძემ. ელჩმა სიტყვით გამოსვლისას ყურადღება გაამახვილა ქართული კულტურული საგანძურის პოპულარიზაციის საქმეში ქართველი მეცნიერების მიერ შეტანილ წვლილზე. ასევე აღინიშნა, რომ წელს სრულდება დიდი ქართველი პოეტის, ირაკლის აბაშიძის

დაბადებიდან 111 წელი.

პარაკლისი ალავლინა ჯვრის მონასტრის წინამძღვარმა, მეუფე ფილუმენუსმა.

ღონისძიებას ესწრებოდნენ ისრაელში მცხოვრები ქართული დიასპორისა და საელჩოს წარმომადგენლები.

აღსანიშნავია, რომ 60 წლის წინ, 1960 წლის 6 ნოემბერს, ქართველ მეცნიერთა ექსპედიციამ, რომლის შემადგენლობაშიც შედიოდნენ აკაკი შანიძე, ირაკლი აბაშიძე, გიორგი წერეთელი, პალესტინის ჯვრის მონასტერში მიაკვლია შოთა რუსთაველის ფრესკას, რომლის ფოტოც საქართველოში ჩამოიტანეს.



[1tv.ge](http://1tv.ge)